

# Fasnacht 2023

## Schnitzel-Bangg

Sit em Schwingfescht z'Prattele in dr Hülfte unde  
hänn's jetz 3 neyi Schwingergriff erfunde  
s'gitt dr Wyberhoogge und dr Brienzer halblang  
dr Kryzgriff, dr Buur und dr Sennegang  
ney isch dr Schälleunterschwing und dr Willi Tell  
und dr Eva Herzog-Abwurf isch jetz aktuell.

Die Wätterschmöcker schmegge s'Wätter do und deert  
au an Ameisehülle schmegge si, ha'ni scho gheert  
an de Bäum schmegge si an spezielle Sorte  
si schmegge an de jäase und gruusigschte Orte  
bim Kuehschwanz heisst's, e chli stingge muess dä Pflätter  
und sait, im neggschte Summer gitt's e verschisses Wätter.

Do hogg ych vor em Färnseh in de Trainerhose  
entspann mi und mecht e bitz Muusig lose  
s'Angebot isch jo gross in divärse Sänder  
denn trälleret aini vor em Miggrofonständer  
s'isch Beatrice Egli im roote Gilet  
aber wenn scho Egli, denn doch lieber d'Filet.

Dr Charles isch jetz dr Keenig vo Ängland äne  
bi dr Camilla kenntsich maine, si haig ständig Migräne  
e Jubiläum hett si no gha, si Mamme - s'Beetli  
und si hänn gfyirt und gfeschtet bi Schämpis und Baschteetli  
scho 70 Joor isch si uffem Thron ghoggt, die Elisabeth  
dasch jo scho verfügt, wemme esooone Verdauig hett.

Wenn Tierli krank sinn tuet das aim schurig weh  
aber so Pandemieä bi de Tier git's immer mee  
do git's Schweinepescht, Rinderwahn und s'Büffelzugge  
d'Vogelgrippe, Milzbrand und jetz no Tigermugge  
d'Rägewürm hänn d'Magersucht drum sinn's so schlangg  
und d'Gummibärli sinn alli zuggergrangg.

Das Musicaltheater kennt me doch mit em Hallebad kompensiere  
denn kennt me deert d'Wassermuusig vom Händel uffyehre  
au d'Niederdorf-Opere - die fänd denn halt im Wasser statt  
oder dr wyssi Hai ass Musical wär doch au no glatt  
und dr folgendi Song wär fir e Musical scho parat  
Nämlich: Tante Schuggi fährt im Hallebad Motorrad...

Dr Minu goht ass in sym rote Kittel  
in d'Manor go boschte bi de Lääbensmittel  
scho länger vermisst me ihn und gheersch so nyt  
är verzellt doch so gärn Gschichtli und das fählt de Lyt  
doch jetz ka'ner wieder schneere - und er stoht ganz glasse  
all Daag in dr Migros an dr Plauder-Kasse.

Die Klimakläber wo sich do an Bode kläbe  
woherschyns hänn die e druurig-verpfuschts Lääbe  
wägem Kläber do frait sich Cementit und Araldit  
aber sunnscht frait das nyemmer under de Lytt  
die selle sich doch an e Flugzyg kläbe  
eso kennte si doch no ihre Höheflug erläbe.

Es gäb e Lehrer-Mangel, und zwar gewaltig  
die Mittailig kunnt vo dr Schuelverwaltung  
es fähle Lehrkräft au im Kindergarte  
und si fähle schyns in alle Schbarte  
aber jetz het me entdeggt - y glaub y spinn  
die fähle numme, will si wieder emol in de Ferie sin.

Dr Federer hett si Racket an Nagel ghängt  
dr Feuz hett si Schyy-Dress an Nagel ghängt  
dr Vettel hett si Helm an Nagel ghängt  
dr Maurer hett si Grawatte an Nagel ghängt  
uss Wuet muess i no an e bestimmte dängge  
wenn dr Putin sich nur au an Nagel wurd hängge.

An dr WM wänn die Dytsche demonstriere  
und mit'ere Armbindi hänn's welle proteschiere  
aber d'FIFA hett's verbotte, das sey nit cool  
denn stehn's aifach ane mit dr Hand vor em Muul  
mit däm hänn's nur eppis erreicht, die Alte  
elf Schwoobe wo e zytlang d'Schnuure halte.

[www.bäffzgi.ch](http://www.bäffzgi.ch)

---

Vottsich au by uns bängg!

Jff [www.vsgbasel.ch](http://www.vsgbasel.ch) erfahrsch meh!

---

